

15 NOV 1998
APEC-BERITA-KIM/I
KIM DAE-JUNG TIBA UNTUK SIDANG KEMUNCAK APEC

SEPANG, 15 Nov (Bernama) -- Presiden Kim Dae-jung dari Korea Selatan tiba dengan pesawat khas di Lapangan Terbang Antarabangsa Kuala Lumpur (KLIA) di sini petang ini, bagi menghadiri sidang kemuncak ketua negara forum Kerjasama Ekonomi Asia Pasifik (Apec), yang bermula Selasa ini.

Kim, yang disertai isterinya Lee Thee-ho, disambut oleh Menteri Kebudayaan, Kesenian dan Pelancongan Datuk Seri Sabbaruddin Chik setibanya di lapangan terbang.

Ini adalah sidang kemuncak Apec yang pertama beliau turut serta sejak menjadi presiden negaranya pada Disember tahun lepas.

Kim akan menyampaikan ucapan pada sesi khas sidang kemuncak perniagaan Apec esok, kata Yoo Ihlhan, seorang pegawai dengan Kementerian Kebudayaan Seberang Laut dan Pelancongan Korea Selatan.

Beliau akan menekankan langkah reformasi semasa yang dilaksanakan oleh kerajaannya untuk meningkatkan keyakinan para pelabur kepada ekonomi Korea Selatan, katanya kepada pemberita di kompleks VVIP Bunga Raya KLIA.

Beliau juga dijangka akan meminta kerjasama serantau dan global bagi mengatasi keadaan kewangan semasa dan krisis ekonomi.

Yoo berkata Kim akan mengadakan perbincangan dua hala dengan Perdana Menteri Datuk Seri Dr Mahathir Mohamad pagi esok, dan petangnya dengan Perdana Menteri New Zealand Jenny Shipley dan Perdana Menteri Singapura Goh Chok Tong.

Pada Rabu ini, Kim akan menemui rakan sejawatannya dari Chile Eduardo Frei, Perdana Menteri Australia John Howard dan Perdana Menteri Kanada Jean Chretien.

-- BERNAMA
NZ TS RI